

ZIRLAI 8-NA

NOVEMBER 17-23, 2018

RINNAA INPUMKHATNA

**CHÂNGVAWN:** “Mi dang tû mâ hnênah chhandamna a awm lo, vân hnuaiia mihring sak zîngah min chhandam tûr hming dang rêng a awm lo,” (*Tirhkohte 4:12*, NKJV).

SABBATH CHAWHNÛ

NOVEMBER 17

**Chhiar tûrte:** *Exodus 20:8-11; Matthaia 25:1-13; Tirhkohte 1:11; 4:8-12; 1 Korin 15:51-54; Hebrai 9:11, 12.*

KUM 1888 khân Seventh-day Adventist kohhran chuan Bible châng pawimawh ðhenkhat hrilhfiah dânah sawi hona an nei chiâm mai a. Pastor-te leh kohhran hruaitûten *Daniela 7*-a ki sâwmte chu tûte nge tih leh *Galatia 3:24*-a dân chungchângah inhniâlna an nei a; an zînga mi tlêm tê chauh chutianga an inhniâl vakna chuan inngeih lohna rilrû puttîrin, an inpâwlhona leh inñhianna chenin a nghawng khaw lo zo tih an hria a; kohhran inpumkhatna leh rawngbâwl hmalâkna chenin a khawih pawî hiâl a ni.

Ellen G. White-in chutiang boruâk pawî a tih thû hrilhin, chutiang sawi honaa tel zawng zawngte chu chîk leh fimkhur taka Isua nêna an inlaichinna ngaihtuah a, Isua kan hmangaihna chu kan nungchangah, a bîkin kan inrem lohna lâiah lantîr ngêi tûr kan ni tiin a fuih hlawm a. Bible chângte kan hrilhfiah dânah kohhrana mi tinte kan inlunguâl vek tûra beisei tûr a ni lo tihte pawh a sawi bawk a.

Thil a sawi uâr tel bawk chu, Adventist thurin pawimawh zînga mî a nih hi chuan hriatthiam dânah inpumkhatna kawng kan zawng tûr a ni tih a ni (Ellen G. White, *Counsels to Writers and Editors*, pp. 28-32). Tûn kâr chhûng hian Bible zirtîrna pawimawh ðhenkhat, Adventist kan nihnaa kan rinna inpumkhatna siamtûte kan en tlâng dân a ni.

SUNDAY

NOVEMBER 18

**Isuaa Chhandamna**

Keini Seventh-day Adventist-te hian Kristian pâwl dangte nêna inanna kan nei nuâl chungin, kan thurinte hi Bible thutak danglam deuh bîk, Kristian khawvêlin a puân vê lohte an ni a. Hêng thutakte hian tâwpna huna Pathian mi ziding kal zêl kan nihna a tifiah a ni.

***Tirhkohte 4:8-12; 10:43* chhiar la. Chhandamna ruâhman a hriatthiam dânah Peteran eng ang takin nge Isua Krista chu a dah pawimawh?**

Tirhkoh Paulan Korin mîte hnêna chanchin ðhâ a hrilhah. “Pathianin Krista-ah chuan khawvêl hi Amah nên inrem in a siam,” (*2 Korin 5:19*) a ti a. Kristâ thihna kha Pâ nêna kan inrem lehna bul a ni a, sual leh thihnain khi-chat a lo siam tawh chu a dawh

zawm leh ta a ni. Kum za eng emawti chhông chu, Kristianten Isuâ thihna, thawhlelehna leh a rawn kal chhan inremlehna chungchâng an ngaihtuah tawh thîn a. Hê inremlehna kalpui dân hi ‘inremna’ (*atonement*) tih a ni a, a awmzia chu ‘pum-khat-lehna’ a ni. Inrem tawh lo ‘inrem’ thar lehna a ni ber. Chutiang chuan, inlaichinna kawnga inngeih lo va lo awm tawh chu inremna neih thar a lo ni leh ta a, chû inremna siamin a rah chhuah a ni a. Kohhran chhônga inpumkhatna pawh chu hê inremna thilthlâwnpêk hi a ni.

**Hêng chângte hian Isuâ thihna leh thawhlelehna chungchâng eng nge an zirtîr?**

Rome 3:24, 25 \_\_\_\_\_

1 Johana 2:2 \_\_\_\_\_

1 Johana 4:9, 10 \_\_\_\_\_

1 Petera 2:21-24 \_\_\_\_\_

Kristâ thihna leh thawhlelehna chungchângah Kristian dang tam takte nêen kan thurin a inang nân, keini chuan chatuan chanhin tha (*Thupuan 14:6*) behchhanin kan puâng a, hei hi *Thupuan 14:6-12-a* vântirhkoh pathum thuchah pêng khat a ni. Keini Seventh-day Adventist-te hi chuan Kristian ûnau dangte tih dân ang lo vin, hêng thuchahte hi kan sawi uâr deuh bîk a ni.

**Engtin nge Kristâ thihna leh thawhlelehna leh chuta beiseina min hluî chu engtik lai hunah pawh ngaihtuah thupui bera neih dân i zir thei ang?**

**THAWHTANNÎ**

**NOVEMBER 19**

**Kristâ Lo Kal Lehna**

Tirhkohte leh Kristian hmasâte kha chuan Kristâ lo kal lehna tûr chu ‘beiseina lâwmawm’ (*Tita 2:13*) angin an ngai a; Isuâ lo kal leh hunah chuan hrilhlâwkna leh Pathian Lehkathûa thutiâm zawng zawngte chu thleng famkim vek tûrin an ngai a. Chû chu Seventh-day Adventist-te pawhin an pawm dân chiah a la ni reng. Dik takin, kan hming ‘Adventist’ tih hian chû chu a phur chhuak nghâl a. Krista hmangaihtu zawng zawngte chuan chû ni lo thleng tûr chu nghâkhlel taka thlîrin, Amah nêna hmâichhana intawng a, inpâwlhona hun tûr a ni. Chû nî chu a lo thlen thlengin, Kristâ lo kal lehna thutiâm chuan Pathian mîte chu min suih khâwm zêl dâwn a ni.

**Kristâ lo kîr leh dân tûr chungchâng eng nge hêng chângte hian an zirtîr? Engtin nge chumi chungchâng ngaihdân tlânglâwn thenkhatte nêen a danglam? *Matthaia 24:26, 27; Tirhkohte 1:11; 1 Thesalonika 4:13-18; Thupuan 1:7; 19:11-16.***

A tlante lam tûrin Isua a lo kal leh dâwn tih Bible hian min tiâm nawn fô va. Hê thil hi ngaihrûat thil mai a ni lo, Amah Isua

ngêiin hetî hian a sawi: “Chu mi nî leh a hun thû chu Pâ chauh lo chuan tû man, vâna vântirhkohte pawhin, Fapa pawhin an hre lo,” (*Matt. 24:36*) tiin. Kristâ lo kîr leh hun tûr hi kan hre lo chauh pawh a ni lo, ‘kan hre lo’ tih min hrilh ngat a ni.

A rawngbâwlna tâwp dâwn khân, Isuan nula thianghlim sâwm mo hmuak tehkhin thû a sawi a (*Matt. 25:1-13*), hei hi A lo kal leh dâwna kohhran nuntawng tûr entîrna a ni. Nula thianghlim pâwl hnihte khân Isuâ lo kal lehna nghâktûa inçhâl mi chi hnihte a entîr a. A lan dân maiah chuan danglamna vak an nei lo; mahse, A lo kal hâr tâk deuh avâng khân an danglamna tak chu a lo lang ta a ni. Lo nghah rei deuh a ngai chungin, pâwl khat kha chuan beiseina an vawng nung reng a, thlarau lam inbuatsaihna tâwk pawh an nei zul zêl bawk a ni.

Hê tehkhin thu hmang hian Isuan A zirtîte hnênah ‘Kristian nuntawng chu rilru phûr hlut thil mai ni lo vin, Pathian thutiâmte thleng famkim hmuh mai tûr awm lêm lo chung pawha A khawngaihna rinçhhan leh, chhel taka rinna nei zui zêl’ tûra zirtîrna pêk a duh a ni. Isuan tûn thlengin keini pawh hi ‘ngaihvena’ A lo kal hun atâna lo inring tûrin min sâwm a ni.

**Kan hming ‘Seventh-day Adventist’ tih hian Isuâ lo kal lehna kan ngaih pawimawhzia a târlang tho nân, engtin nge mi mal taka Isuâ lo kal lehna chu atak ngêi a ni tih kan pawmzia kan vawn nun reng ang? Tehkhin thûa Isuâ vaulâwkna ang khân engtin nge kan tih sual loh theih ang?**

**THAWHLEHNÎ**

**NOVEMBER 20**

**Vân Biak Bûka Isuâ Rawngbâwlna**

Thuthlung Hlui hunah Pathianin hê leia a ‘chênna’ (*Ex. 25:8*) tûrin Mosia kha biak bûk (hmun thianghlim) sa tûrin a hrilh a. Chuta rawngbâwlna hmang chuan Israelte chu chhandamna ruâhman zirtîr an ni thîn a. A hnû, Lal Solomona hunah khân, zâwn sawn theih biak bûk chu Tempul ropui taka thlâk a ni ta a ni (*1 Lalte 5-8*). Biak bûk leh tempul kha vâna mi, “Hmun thianghlim leh biak bûk tak tak mihring sak ni lo, LALPÂ sak zâwk” (*Hebrai 8:2*) anga sak an ni.

Bible-in min kawhmmuh angin vânah biak bûk tak tak, Pathian chênna hmun chu awm tûra ngaih a ni. Lei biak bûka rawngbâwlnate kha chhandamna ruâhman leh vâna Isuâ puithiam rawngbâwl dân ‘entîrtu’ a ni.

***Hebrai 8:6; 9:11, 12, 23-28; 1 Johana 1:9-2:2* chhiar la. Hêng chângte hian vâna Isuâ puithiam rawngbâwlna chungchâng eng nge min zirtîr?**

Vân a lâwn atang khân vân biak bûk chu chhandam kan nihna tûra Kristan A puithiam hnâ a thawhna hmun a ni a (*Hebrai 7:25*). Chuvâng chuan “zahngaihna kan hmuh theihna tûr leh, puith kan

ngaih huna tanpuina leh khawngaihna kan hmuh theihna tûrin, khawngaihna lal̄thutphah chu huai takin i hnaih” (4:16) tûra fuih kan ni.

Lei biak bûka puithiam rawngbâwlna kha chhâwng hnih—nî tina Hmun Thianghlîma rawngbâwlna leh kum tina Hmun Thianghlîm Bera rawngbâwlna a ni a. Chutiangin vânah pawh Isuâ rawngbâwlna chu chhâwng hnih a ni. Hmun Thianghlîma a rawngbâwlna chu dîlsakna te, ngaihdamna te, inremna te leh dinthar lehna te a ni ber. Sawipuitu Isuâ zârah mi sualin Pâ hnên thlen nghâl theihna an nei a (1 Johana 2:1).

Kum 1844 aţanga Isuan vân biak bûk Hmun Thianghlîm Bera rawng a bawlna chu rorêlna leh tlenfaina niin, chutiang chu kum tina Inremna Nî-ah (*Leviticus 16*) khân neih a ni thîn. Biak bûk tlenfai rawngbâwlna hi Isuâ thisen chhuak behchhana neih a ni a. Khâ nîa inremna siam khân tâwpna huna Kristâ tlinna ataka hman tûr leh, sual thenfaina lo entîr lâwkin, Pathian rorêlna hnuaia khawvêl zawng zawng inrema awmtîr lehna chu a kâwk baw. Hê rawngbâwlna chhâwng hnih hi, chhandamna ruâhman pum pui hriatthiamna tûra Adventist-ten thurin danglam bîk an chhawp chhuah chu a ni.

## **NILÂINÎ Sabbath Chu**

**NOVEMBER 21**

Seventh-day Adventist-ten Bible zirtîrna pawimawh tak an rin leh châwisân dang leh chu ni sarihna Sabbath hi a ni. Hei hi thurin pawimawh, kan zînga inpumkhatna leh inpâwlhona siamtu a ni a. Kristian khawvêlah hian mi tlêm tê tih loh chu thuruâlpui kan nei vak lo.

Sabbath hi Thilsiam chawlhkâra mihringte hnêna Pathian thilthlâwnpêk a ni (*Genesis 2:1-3*). Thilsiamnaah khân Pathian thil tih pathum hmanga Sabbath chu dinngheh a ni a, chûngte chu: 1) Sabbath nî-ah Pathian a châwl a; 2) Chû nî chu mal a sâwm a; 3) A tithianghlîm baw a ni. Hetianga chêtna kawng thum hmang hian Sabbath chu Pathian thilthlâwnpêk bîk, hê leia vânrâm an chên theihna leh ni-ruk chhûngin Pathianin thil a siam tih nemngheh nân a ni. Rabbi lâr tak pakhat, Abraham Joshua Heschel chuan Sabbath hi ‘huna lal in’ a vuah a; danglam bîk deuh taka Pathianin A mîte a rawn tawhna ni thianghlîm a ni.

**Hêng chângte hian Sabbath chu mihring tân a nih chungchâng eng nge an zirtîr?** *Exodus 20:8-11; Deuteronomi 5:12-15; Ezekiela 20:12, 20.*

Isuâ tih dân (*Luka 4:16*) zui châkin, Seventh-day Adventist-te chuan kêr khata ni sarihna Sabbath an serh thîn a. Sabbath inkhâwma a tel vê thinna khân hê nî hi chawlhna leh chibaibûkna nî a ni tih a nemngheh a. A thilmak tih thenkhat kha Sabbath nî-a tih a ni hlawm a, chû chu Sabbath serhna (*Luka 13:10-17 en la*)

azâra lo thleng (tîsâ leh thlarau) damna zirtîr nân a ni. Tirhkohte leh Kristian hmasâte khân Isuan Sabbath a tibâng lo tih an hrethiam a; anni pawhin serhin, chumi nî chuan (Pathian biak) inkhâwmna an nei thîn a ni (*Tirhkohte 13:14, 42, 44; 16:13; 17:2; 18:4*).

Sabbath nihna duhawm tak dang leh chu, sual atanga chhanchhuah kan nih chhinchhiahna a ni hi a ni. Sabbath chu Israel mîte Aigupta bâwiha an tâna atanga Pathian chhandamna hriatrengha a nih bâkah, Kanaan rama an chawlhna tûr thutiam a ni bawk (*Deut. 5:12-15*). An thuâwih loh leh milem biak fona avângin Israelte kha hê chawlhnaah hian an lût ta chiah lo nân, Pathian chuan “Pathian mîte tân chuan chawlhna a la awm ta fo va” (*Hebrai 4:9*) tih chu a la tiâm cheu tho a ni. Chû chawlhnaa luh duh apiangte chu, Isuan chhandamna kawng a buatsaih rinna zârah an lût thei a. Sabbath chawlhna hian Kristaa thlarau lam chawlhna, sual laka min chhandam a chatuan nunna min pe tûrin, kan thiltihte ni lo, Amâ thatna chu kan rinchhan tih a entîr (*En tûr: Heb. 4:10; Matt. 11:28-30*).

**Engtiang kawng lang sâr deuh takin nge Kristan a mîte tâna a duhsak inpumkhatna leh inpâwlhona ataka chang tûra Sabbath-in a lo tanpui tawh che?**

NINGÂNÎ

NOVEMBER 22

**Thihna leh Thawhlehna**

Thilsiamnaah khân, “Pathianin leia vaivut hmangin mihring a siam a, a hnârah chuan nunna thâw chu a thaw lût a, mihring chu mi nung a lo ni ta a,” (*Genesis 2:7*). Heta mihring siam dân chungchâng hian nunna lo chhuahna chu Pathian a ni tih a târlang a. Thihtheihlohna hi hê nunna tel nghâl hi a ni em? Bible chuan Pathian chauhin thihtheihlohna a nei tih a sawi a (*1 Timothea 6:16*). Mihring a lo pian hian theihtheihlohna pêk a ni lo. Pathian ang lo takin, mihringte chu thi thei an ni a, Pathian Lahkha Thû chuan kan nun hi “tuihû rei lo tê lo lang a thâm ral zui leh nghâl ang mai” (*Jakoba 4:14, NKJV*) a ni tih a sawi a. Kan thih hian kan nunna chu muhîl ang niin hriatna rêng a awm tawh lo (*En tûr: Thuhritu 9:5, 6, 10; Sâm 146:4; 115:17; Johana 11:11-15*).

“Pathianin khawvêl a hmangaih êm êm a, chutichuan A Fapa mal neih chhun a pê a, Amah chu tû pawh a ring apiang an boral loh a, chatuan nunna an nei zâwk nân,” (*Johana 3:16*).

**1 Korin 15:51-54; 1 Thesalonika 4:13-18 chhiar la. Hêng chângte hian thih hnu nun, mihringte hnêna thihtheihlohna pêk a nih hun tûr chungchâng eng nge min hrilh?**

Tirhkoh Paula chuan Pathianin mihringte hnêna thihtheihlohna a pêk hun tûr chu, thih hunah ni lo vin, tâwtawrâwt hnuhnung ber a rîk a thawhlehna thlen hunah a ni dâwn tih Chiang takin a sawi.

Ringtûten Isua chu an Chhandamtûa an pawm vêleh hian chatuan nunna thutiâm chu an dawng nghâl a, thihtheihlohna erawh chu thawhleha hunah chauh pêk an ni ang. Thuthlung Thar lamah hian mî an thiha an thlarau vâna lâwn tih lam thû rêng a sawi lo; hetiang zirtîrna hi ringlo mîte tichhuah niin, hmânlai Grik mifingte phuah chhuah a ni a, Thuthlung Hlui leh Thar lamah chutiang rêng a awm vê lo.

**Engtin nge thihna chungchâng manthiamnain Isuâ lo kal lehna tûr thutiam min ngaihhlut zuâltîr? Engtin nge hê thurin hian keini Seventh-day Adventist-te hi ngeth taka min phuâr khâwm?**

**ZIRTÂWPNÎ**

**NOVEMBER 23**

**Ngaihtuah tûr:** Keini Seventh-day Adventist-te hian Kristian ûnau dangte nêen thurin thuhmun pawimawh tak tak kan inîawm tlâng a. Chûng zînga pawimawh tak pakhat chu ‘kan âiawha Isua thihna leh tlanna rinna avânga chhandamna’ hi a ni. Kristian dangte ang bawkin, felna kan hmuhna chu, keini tih vâng ni lo vin, Kristâ felna, khawngaihna thilthlâwnpêk, rinnaa kan chan a ni. Ellen G. White-in heti hian a zia: “Krista’n a phû chu kan chan theih nân, kan phû ang ngeia kan chung a tla tûr chu A chungah a tla ta zâwk a. Keinin kan neih ve rêng rêng loh A felna thiam chantîr kan nih theih nân, A neih ve miah loh kan sualna avângin thiam loh chantîr a ni. A nunna kan tawmpui theih nân, kan tuar tûr rêng thihna chu Anin a tuâr ta hlauh zâwk a.”—Ellen G. White, *Chatuan Nghahfâk*, p. 19.

Chutih ruâlin, a pum pui thû ngaihtuahin, kan thurin bulpuite, chûng thurinte atanga lo chhuak chînphan leh nunphungte vâng hian Kristian khawvêlah danglam bik riâuna kan nei a. Chû tak chu Seventh-day Adventist kan nihnaa kan din chhan pawh a ni rêng dâwn lo’ m ni? Isua kan hmangaihna te, zirtîrna kan puânchhuah te hi min suihkhâwmtu thiltithe ber a ni tûr a ni.

**Sawi ho tûrte:**

- ❶ Pi White-in a lehkhabu *Faith and Works*, p. 103-ah thiamchantîrna leh sualte ngaihdamna hi thil thuhmun angin a sawi a. Engtin nge Kristaa ngaihdam leh thiamchantîr kan nihna ngaihhlutna chu rinnaa kan ûnate nêna inhuho leh inpâwlhona lungphûm ber tûr a nih?
- ❷ Kohhran inpumkhatna atâna kan thurinte pawimawhna ngaihtuah la. Kan thurinte bâkah, khawvêl ram hrang hranga mi chi hrang, nunphung inang lo tak takte zâi khata min luântirtu chu eng nge ni ang? Chû chuan thurin pawimawhzia eng nge min hrilh?
- ❸ Kan hming ‘Seventh-day Adventist’ hian thil pawimawh pahnih: nisarihna Sabbath leh Kristâ lo kal lehna tûr a zirtîr a. Kan hming chanvê hian Thilsiamna a kâwk a, a dang leh hian tlanna a kâwk vê thung. Engtin nge hêng zirtîrna

**pahnihte hi an inlaichîn a, kan nihna pawimawh tak chu engtiang kawngtein nge an târlan?**

**KHÂIKHÂWMNA:** Seventh-day Adventist-ten thurin bulpui tlânglâwn pawm an ngah mai. Ẹhenkhat chu Kristian dangte nêp pawh a inzûl a, Ẹhenkhat chu a inpersan thung. A pum pui thû ngaihtuahin, hêng zirtîrnate hian kohhran danglam kan nihna leh Isuaa kan inpumkhatna chu a târlang a ni.